

Exercicio Unidade 9 – O movemento obreiro.

1. Comentario de textos:

1. Fragmento dunha carta pastoral do bispo de Vich, durante a folga de 1855

«Conxurámosvos polas entrañas de noso Señor Xesucristo que abandonedes esa actitude que tanto desacougo e alarma causan ás vosas autoridades e a todos os vosos concidadáns; que volvades ao traballo, aos vosos talleres onde co honrado traballo das vosas mans podades gañar o sustento das vosas familias (...) se na vosa vida laboriosa tendes que suxeitarvos a algunhas privacións, a relixión ensínanos a resignación e o sufrimento, a relixión consólanos, prometéndonos máis abundantes felicidade para unha vida vindeira, canto maiores foran as privacións na presente».

2. Folga das cigarreiras da Coruña. 1857

«O luns 7 do actual houbo un pronunciamento de mulleres na fábrica da Palloza desta cidade. Parece que en lugar dos cigarros que se facían antes nesta fábrica están agora ensaiando a construción doutros de diferente feitura e cunhas follas que van engomadas, suprimíndolles as virxinias ou comúns e os de capa habana ou mixtos; e en vez destes crearon un obradoiro de pitillos cunha máquina para picar tabaco. Como ámbalas dúas operacións son novas, non se prestan nin se axeitán a elas as cigarreiras, porque non saben facelos, tardando tanto en elaboralos que a penas sacan a terceira parte do xornal a que estaban afeitas. Isto, e o pouco satisfeitas que están co director da fábrica, alporizounas en termos que o expresado día 7, sobre a unha da mañá, alborotáronse aquelas 4.000 mulleres, arremeteron contra os xefes e empregados do establecemento, destruíron todo o tabaco picado, pitillos e folia que tiveran a man, e o que había tempo que estaban elaborando, pisándoo e botándoo ao mar, rompendo en mil anacos as máquinas novas para picar o tabaco, e que din que custaron 14.000 pesos, botándoas ao mar, o mesmo cós mobles, papeis, libros de caixa e efectos que atoparon nas habitacións do director.»

(Xornal *El País*, Pontevedra, nº 16, 13/12/1857)

3. Reclamación das sociedades obreiras de Madrid. 1891

«Usando por segunda vez dun dereito que a Constitución do Estado concede a todos os cidadáns, acudimos ao Poder Executivo en demanda dunha lexislación do traballo que positivamente mellore o aflictivo estado no que se atopan os produtores.(...) A clase obreira, que ten unha conciencia cada día máis aberta, quere redimir totalmente, quere ser libre de veras, quere que o produto do seu traballo, en vez de facer ricos e millonarios aos que non verten unha gota de suor, só a ela poida pertencer.

Mais como para conseguir este ideal hai que diminuír a explotación, aumentar os medios de vida aos obreiros e facilitarlles o coñecemento dos seus intereses, de aí que o proletariado militante reclame ante todo e sobre todo unha lexislación internacional do traballo. **Desa lexislación o que máis urxe, o que máis precisa é a lei que determine como xornada máxima de traballo en todos os oficios oito horas.**

Mentres esa lei non se dicte e practique non haberá xeito de dar colocación a miles de obreiros que carecen dela; mentres a xornada legal de oito horas non sexa un feito, os salarios a penas terán aumento, e, por conseguinte, a miseria obreira será tan aguda como agora; mentres esa conquista non se alcance, imposible que os traballadores poidan adquirir unha mediana instrución, ao solicitar esa lei, e solicitala con carácter internacional, nin os traballadores piden un imposible, nin menos aínda un privilexio.

Non é imposible establecer a xornada de oito horas, porque con ela nin a industria se arruína nin sufrirá quebranto algún a produción; antes ao contrario, conseguindo con dita xornada dar traballo aos que hoxe non o teñen, o consumo será maior, e, polo mesmo, a industria e a agricultura resultarán favorecidas. Non é privilexio a xornada de oito horas, porque aumentando de ano en ano a riqueza nacional, sendo a potencia productiva cada vez maior, nada máis racional nin máis xusto que deses beneficios chegue unha pequena cantidade aos que teñen perfecto dereito a moito máis (...).

Reclamación das sociedades obreiras de Madrid ao goberno o 1 de maio de 1891

Cuestións:

Tedes que facer un comentario dos tres textos xuntos, nunha única redacción.

1. Introducción de presentación dos documentos en relacións coas circunstancias históricas de que falan os documentos
2. Análise dos contidos dos documentos seleccionando as ideas máis importantes e establecendo unha xerarquía de ideas principais e secundarias.
3. Relacionar cada documento co seu contexto histórico e a súa transcendencia
4. Conclusión obxectiva global